

Hydruntina, Monopolitana, et aliis civitatibus, terris tam maritimis et insulis, quam terrestribus et locis eorum ditioni obtemperantibus ac aliis eorum bonis dicta auctoritate privamus, ita ut nil ex illis transmittatur ad posteros, et ipsos sic privatos respective ad illa et alia quaecumque dignitates, administrationes et officia saecularia in posterum obtinenda inhabilitamus: eorumdemque monitorum subditos, vassallos et feudatarios et praesertim Paduanae, Veronensis, Vicentinae, Cremonensis, Brixienensis, Tarvisinae, Pergamensis, Trigistinae, Tranensis, Brundusinae, Hydruntinae, Monopolitanae aliarumque civitatum, terrarum et locorum etiam de facto per eos obtentorum hujusmodi cives, incolas et habitatores et fortalitorum et arcium in eis degentes castellanos et custodes a quorumvis fidelitatis juramentorum per eos dictis monitis non parentibus praestitorum observatione, jure vassallatico et subjectione absolvimus et penitus liberamus. Et ut alii eorum exemplo perterriti similia non attentent, volumus et de simili consilio dicta auctoritate et potestatis plenitudine decernimus, quod Leonardus dux et alii sic moniti, excommunicati, interdicti, iteratis vicibus aggravati, anathematizati, maledicti et privati, et in suo pessimo proposito non parendi hujusmodi monitionibus et mandatis nostris perseveraverint, ex tunc infames existant, et ad testimonium non admittantur, testamenta et codicillos condere et ad alicujus successionem ex testamento vel intestato pervenire non possint: et si jurisdictionem habeant, causae ad eorum examen non deducantur, nec valeant eorum sententiae vel processus: nullus pro eis, nec ipsi pro aliis in quacumque causa procurare possint, et si qui eorum notarii existant, instrumenta per eos confecta non valeant, sed cum auctore damnato damnentur: eorum debitores ab his quae eis debent liberi existant: nulli eis, sed ipsi aliis super quocumque negotio de jure respondere teneantur: filii quoque et nepotes aliique descendentes eorumdem usque ad quartam generationem, ecclesiis, monasteriis, canonicatibus, dignitatibus et aliis beneficiis